

LE BUZÚAJĚ' LU GUICH SANTIAGO

Santiago rugapë' Dios bönni' judío ta'dé'ë Cristo

1 ¹ Neda', Jacobo, naca' huen dxin queë' Dios, enca' queë' Xanru' Jesucristo. Rugapa' Dios libí'ili', nácali' idxinnu cö' di'a dza quégaca bönachi Israel, násilasili' idú yödzölió ni.

Yöl-la' réajni'i le runnë' Dios queëru'

² Böchi' luzá'ado', cate' gaca bi gaca queéli' le si' bë' libí'ili', ral-la' udzéjali' idú ládxi'li' ³ tu' nöz quézili', cate' bi raca queéli' le rizí' bë' libí'ili' ca réajlë'ëli' Cristo, lë ni rusedi libí'ili' cózali' zxön ladxi'.

⁴ Guli'güí' ládxi'li' gaca idú yöl-la' zxön ladxi' queéli', para údxi gácali' bönni' ta'yéajni'inë', en biti' bi yadzaj queéli' ca nácagaca lë ni.

⁵ Channö zoa ladaj libí'ili' nu biti' réajni'ini, nu na' ral-la' inabi-në' Dios, ate' Dios caz gunnë' yöl-la' réajni'i que, tu' runödzjë' yödxí yana' quégaca yúgu'të bönachi, en biti' ca' réqui quézinë' gunnë' queëru'.

⁶ Na'a, nu bi rinabi-në' Dios, run bayudxi tséajlë' Lë', en cabí gaca chopá ladxi'. Nu raca chopá ladxi', raca que ca raca que bidxina' que nísado' cate' rutá bö' le, ruzéaj bö' le nilö ná'alö. ⁷ Nu naca caní biti' ral-la' gun löza si' bi unödzjë' Xanru'. ⁸ Bönni' na' reaj bö' ládxi'da'ahuë' biti' ridzólinë' nácalö gunë'.

⁹ Channö zoë' tu bönni' böchi'ru' réajlë'ë Cristo, en náquië' cá'asö yödzölió ni, ral-la' udzéjanë' tu' chinadéli'në' tu lataj lo lahuë' Dios.

¹⁰ Bönni' böchi'ru' na' rilé'enë' yöl-la' tsahui' queë' ral-la' udzéjanë' cate' runë' Dios ga bíti'rö ruzxöni ládxi'ë lë na' dë queë'. Nu ruzxöni ladxi' yöl-la' tsahui' que, gaca que nu na' ca raca que xiyija guíxi'do', la' ridóditë que. ¹¹ Caní naca, tu' gaca que nu na' ca raca que xiyija guíxi'do' na' cate' rilén gubidza, en rudzá'ada', la' ribídxitë guixi' na', en riguinnaj xiyija, en riniti yöl-la' lachi que. Lësca' caní gaca queë' bönni' rilé'enë' yöl-la' tsahui' queë', inítië' tsanni ni runë' dxin riguilmjë' yöl-la' tsahui' na'.

Le ta'zí' bë' rë'u

¹² Bica' ba bönni' böchi'ru' na' ruá' rilenë' le rizí' bë' lë'. Cate' chiburúajë' tsahui', idéli'në' yöl-la' na'bán idú, ca na' rideli' nu nutsa' lu huitaj, nu rideli' tu bregui' zin. Bönni' böchi'ru' na' náquië' bica' ba tu' idéli'në' yöl-la' na'bán idú na' guzxi' lu në'ë Dios unödzjë' quégaca nupa nadxí'iguequi Lë'. ¹³ Cate' bi raca queëru' le run ga gué'ëniru' gunru' le ruá' dö', biti' ral-la' innaru': "Dios rizí' bë'ë rë'u len le naca xihui'." Dios biti' rizí' bë'ë nu bönni' len le cabí naca dxi'a. ¹⁴ Na'a, channö nu bi raca que le rizí' bë' le len le cabí naca dxi'a, naca tu' rizé ladxi' le ruá' dö',

ate' lë ni ben ga gú'uni gun le ruá' dö'. ¹⁵ Lë na' rizé ládxi'ru' le ruá' dö' run ga gunru' dul-la', en cate' chibudxi benru' dul-la' na', la' dul-la' ná'asö rusubaga' rë'u xíguia' gátiru'.

¹⁶ Böchi' luzá'ado', biti' si' ye'e la' cuínsili'. ¹⁷ Yúgu'të le naca dxi'a, en yúgu'të le naca idú le ruzí'iru' xibé, zá'gaca saca' xitsá'alö, en ta'rúaj ga zoë' Xúziru' Dios, Nu ben yugu' le ta'yëpi yösa lúzxiba, yugu' le tu'tsá' cuínguequi, pero Lë' biti' rutsá' cuinë', en biti' rutsé'ë ca runë', rúnnatica'së' queëru' le naca tsahui'. ¹⁸ Ca ré'ëni quézinë' Dios, benë' ga nácaru' bönachi cubi queë'. Bugunë' dxin didza' queë' le naca idútë li, para gácaru' ca tu gulapa zí'alö queë' ladaj yúgu'të nupa na' guró cazë' Dios.

Le reaj ládxi'ru'-në' Dios le naca li ladxi'

¹⁹ Que lë ni na' rea' libí'ili', böchi' luzá'ado', yúgu'tëli' ral-la' sóali' sina' yónili', pero biti' ral-la' innétëzili', en biti' ilétëzili'. ²⁰ Nu na' riletëz biti' run le naca tsahui' lahuë' Dios. ²¹ Que lë ni na', guli'cá'ana yúgu'të le ruá' dö', en yúgu'të le zían le cabí naca tsahui', ate' lu yöl-la' nöxaj ladxi' guli'sí' lu ná'ali' didza' na' chinayaza icja ládxi'do'oli', tu' huáca gun didza' ni ga uláli'.

²² Na'a, guli'gún ca rnna didza' ni, en cabí yónisili', tu' channö yónisili' didza' ni, si' yé'eli' la' cuínsili'. ²³ Nu riyónisö didza' ni, en biti' run ca rnna, nu ni naca ca tu bönni' ruyúë' lahuë' tu lu guié dxili, ²⁴ tu' ruyú cuinë', en söhuójë', ate' la' ral-latë ládxi'ë ca riné'ë. ²⁵ Na'a, nu bönni' biti' ral-la ládxi'ë le riyönnë', pero ruí'i ládxi'ë xibá queë' Dios le naca idú li, en le gaca gun ga uláru', ate' ugá'anë' tsutsu, en gúntica'së' ca rinná bë' xibá na', gaquië' bica' ba ca naca yúgu'të le runë'.

²⁶ Channö nu bönni' ladaj libí'ili' réquinë' naca dxi'a ca reaj ládxi'ë Dios, pero biti' rapa chi'ë lúdxë'ë para cabí innësë' ca', bönni' ni rizí' yé'enë' la' cuinsë', ate' biti' raza ládxi'ë Dios ca reaj ládxi'ë bönni' na' Lë'. ²⁷ Le reaj ládxi'ru'-në' Dios, le naca idú, en le naca dxi'a, naca gácalenru' yugu' bi'i uzébidu', enca' yugu' nigula nagá'ananu túzinu, cate' ta'guí'i ta'zaca' nupa na', en cabí gútsa'ru' le cabí naca tsahui' le raca yödzölió ni.

Tuz ca ral-la' gunru' bönachi bal

2 ¹ Böchi' luzá'ado', channö réajlë'ëli' Xanru' Jesucristo, Nu nácatëro lo, biti' ral-la' utsá'ali' ca gunli' bal tu tu bönachi. ² Channö tsázië' tu bönni' ga na' nudúbili', en nagu'ë xibón në'ë le néquini oro, en nácuë' lari' nazáca'da', ate' tsázië' ca' tu bönni' yéchi'do', nácuë' lari' cá'asö, ³ channö gunli' bal bönni' na' nácuë' lari' nazáca'da', en guiéli'-në': "Guró'ölen rë'u ga ni naca dxi'a", pero guiéli' bönni' yéchi'do' na': "Ná'asö guzuí", o guiéli'-në': "Gurö'i lu yu ni."

⁴ Channö caní runli', rutsá'ali' ca runli' bal tu tu luzá'ali', en run cuinli' ca nu ruchí'a rusöró luzé'e, biti' naca dxi'a ca rizá' ládxi'li'.

⁵ Böchi' luzá'ado', buli'zé nágalí' lè ni. Dios guró cazè' yugu' bönni', sal-la' téquiguequi bönachi yödzülió ni nácagaquiè' cá'asö, para ila'déli'nè' yöl-la' tsahui' lahuè' Lè' tu' ta'yéajlè'ë Cristo, en gata' quégaquiè' lataj ga ni' rinná bè'ë Lè'. Gata' quégaquiè' lè na' guzxi' lu nè'ë Dios unödzejè' quégaca nupa ta'dxi'i Lè'. ⁶ Libí'ili' rucá'anali' cá'asö bönachi yechi' ca', en runli' bal yugu' bönni' dè yöl-la' tsahui' quégaquiè', ate' bönni' na' dè yöl-la' tsahui' quégaquiè' tu'saca' zi'ë libí'ili', tu' tu'gunè' libí'ili' dxin. Lësca' tu'dödè' libí'ili' lu ná'agaquiè' bönni' yúlahui'. ⁷ Yugu' bönni' na' dè yöl-la' tsahui' quégaquiè' ta'nné zi'ë ca' que Lè' Jesucristo le nazáca'tërö, en ca naca Lè' nazí'i lali': "Nupa Dá'gaca Cristo."

⁸ Runli' dxi'a channö runli' idú ca rinná bè' xibá lo, le nazúaj lu guichi, en rna caní: "Ral-la' idxí'inu' luzó'o ca nadxí'i cuinu'." ⁹ Na'a, channö rutsá'ali' ca runli' bal tu tu bönachi, runli' dul-la', en nabága'li' xíguia' lu xibá queè' Dios, tu' riguítjiali' xibá na'. ¹⁰ Channö runè' tu bönni' idú ca rinná bè' xibá queè' Dios, pero channö ichíxinè' ca naca tuz le rinná bè' xibá na', chinabáguè'ë xíguia' que idútè le rinná bè' xibá na'. ¹¹ Lè cazè' Dios gunné': "Biti' gunu' dul-la' le riguitsaj xibá que yöl-la' nutsaga na'", en gunné' ca': "Biti' gútiu' bönachi." Na'a, channö cabí runu' dul-la' le riguitsaj xibá que yöl-la' nutsaga na', pero rútiu' bönachi, nabágu'u xíguia' que idútè xibá queè' Dios. ¹² Ca innali', en ca gunli', ral-la' gunli' ca ral-la' ilún nupa uchi'a usöröè' Dios légaquiè' ca rinná bè' xibá na', le run ga uláru'. ¹³ Nupa cabí tu'huechi' ládxi'gaca luzé'eguequi, uchi'a usöröè' Dios léguequi, ate' cuntú nu huéchi' ladxi' léguequi, pero nupa na' tu'huechi' ládxi'gaca luzé'eguequi ulu'rúaj dxi'a cate' uchi'a usöröè' Dios léguequi.

Le ral-la' gunru' tu' réajlè'ëru' Cristo

¹⁴ Böchi' luzá'ado', biti' bi uzi'ë xibé tu bönni' channö innasè': "Réajlè'a Cristo", pero biti' runè' le naca tsahui'. Biti' gaca ulé' bönni' na' channö innasè' réajlè'ë Cristo. ¹⁵ Channö nacu'ë böchi' luzá'aru' ta'yéajlè'ë Cristo, en biti' dè le ilácuè', en calëga le ilahuè', ¹⁶ ate' channö tu nu dzaga libí'ili' guiésö légaquiè': "Böaj lídxi'li' tsáhui'do'. Chibölaj budzé'eli'", pero channö cabí unödzaj quégaquiè' lè na' ta'yádzjanè', biti' ca' gúcalen légaquiè'. ¹⁷ Lësca' caní raca que nu bönni' rnnasè' réajlè'ë Cristo. Channö cabí runè' le naca bè' naca idú ca réajlè'ë Lè', biti' naca lesaca' yöl-la' réajlè' queè'.

¹⁸ Nadxi ca' guié' tu bönni' luzé'ë: "Li' réajlè'ësu' Cristo, ate' neda' runa' le naca tsahui'. Biti' gaca uluí'inu' neda' réajlè'u Cristo channö cabí zoa le naca tsahui' runu'. Neda' uluí'ida' li' réajlè'a Cristo ni'a que le naca tsahui' runa'." ¹⁹ Li' réajlè'u tuzè' náquiè' Dios. Naca dxi'a ca

runu'. Lësca' caní ta'yéajlë' yugu' bö' xihui', en ta'zxizi tádxida' Lë'.
²⁰ Li', bönni' bití' bi nózínë'. Ral-la' inózi quézinu' channö zoa nu rnнасö réajlë' Cristo, pero bití' run le naca tsahui', bití' naca lesaca' yöl-la' réajlë' Lë' que nu na'. ²¹ Naca bë' burúajë' xúziru' Abraham tsahui' lahuë' Dios ni'a que lë na' benë', cate' ni' gulu'ë-bi' bi'i Isaac queë' lahuë' Dios. Gulu'ë-bi' ca na' tun bönachi ta'gú'u le tu'zegui' lahuë' Dios, sal-la' bití' buzégui'ë-bi'. ²² Na'a gaca inózili' ca guca queë' Abraham. Lë na' benë' guca bë' guyéajlë'ë Dios. Ca' naca, guca bë' naca idú ca guyéajlë'ë Dios ni'a que lë na' benë'. ²³ Caní guca lë na' nazúaj lu guichi lá'ayi le rnna: "Abraham guyéajlë'ë Dios, ate' Dios bilé'enë' lë na' benë' ca tu le ben ga böáquië' Abraham tsahui'." Que lë ni na' guzxí'i lë: "Luzé'ë Dios."

²⁴ Na'a, rilé'e quézili' naca bë' rurúajë' tu bönni' dxi'a ni'a que le runë', en calégasö tu' réajlë'ë Dios. ²⁵ Lësca' caní guca queënu Rahab, nigula bé'ënu bönachi lataj. Lësca' naca bë' burúajnu dxi'a tu' zoa tu le tsahui' bennu, lë na' bennu cate' ni' bennu bönni' tu'yulan bal, en gúcalennu légaquië' para bulu'guélë'ë yöjhuójgaquië' nōza yúbölö. ²⁶ Ca na' raca que idútë le naca cázaru' channö cabí yu'u bö', chinati, lësca' caní naca que le réajlë'ëru' Cristo channö cabí nalá' yöl-la' run que, bití' naca lesaca'.

Yugu' le rnna lúdxí'ru'

3 ¹ Böchi' luzá'ado', bití' guntëz zían cuinli' bönni' tu'sédinë' bönachi, tu' chinóz quézili' zít'ërö uchi'a usöröë' Dios rë'u, núlöru' rusédiru' bönachi. ² Yúgu'tëru' runru' zían le richixi riníguiru'. Channö cabí richixi riníguinë' tu bönni' ca naca didza' ru'ë, bönni' ni náquië' idú tsahui', en raca inná be'e cuinë' ca naca yúgu'të le runë'. ³ Cate' rigú'uru' guíë ruá'agacaba' böa' para gunru' ga ilunba' ca ré'ëni'ru', gaca inná bé'eru' légacaba' lu idútë le tunba'. ⁴ Buli'yú ca' ca raca quéguequi barco. Sal-la' zxöntërö naca tu barco, en récjada' bö' ruzéaj le, cuídi'do'os naca në'e xiyágui barco na' le ruzecaj rudxí'i barco para tseaj gátit'tës ga gué'ënnë' bönni' rusé'ë le. ⁵ Lësca' caní naca lúdxí'ru'. Sal-la' cuídi'do'os naca, zían'tërö le rnna lúdxí'ru' na'. Buli'yútsöca' ca run guí'. Sal-la' guí'do'os ribíbiru', tu guí'a sibi huayégui. ⁶ Lësca' lúdxí'ru' na' naca ca tu guí'. Yúgu'të le ruá' dö' raca yödzölió ni rnna lúdxí'ru', en tu' dzaga lúdxí'ru' na' idútë le naca cázaru', que lë ni na' run ga raca xihui' idútë le nácaru'. Le rnna lúdxí'ru' ribequi guí', le ruzegui' rë'u ca naca yúgu'të le runru', ate' tu' rnna caní lúdxí'ru' na', naca que tsca chinaguéla'të guí' le nabequi' tu' xihui'. ⁷ Yúgu'tëba' böa' guixi' ta'daba' luyú, en yugu' böa' zoa xíligacaba', en yugu' böa' tá'ayöj lé'ëba' lu yu, enca' yúgu'tëba' böa' dzó'öba' lu nísado', huáca ila'nná be'e bönachi luyú ni légacaba', ⁸ pero cuntú nu bönni' gaca inná bé'enë' lúdxë'ë, tu' rnna lúdxí'ru' le ruá' dö', en bití' gaca nu uzaga' xinözi.

Ziánterö le rnna lúdxiru' le naca ca tu le naché' yöl-la' guti. ⁹ Len la' lúdxiru' ná'asö rulidza tsáhui'ru'-nè' Dios Xuz, en rulidza dí'tjaru' ca' yugu' bönni', ate' benè' Dios légaquiè' ca naca cazè' Lè'. ¹⁰ Caní naca, len la' ruá'asiru' na' rulidza tsáhui'ru' bönachi, en rulidza dí'tjaru' bönachi. Böchi' luzá'ado', biti' ral-la' gaca caní. ¹¹ Biti' ca' ta'lén nisa siziá', en nisa zöna' la' tuzi ga ta'lén. ¹² Böchi' luzá'ado', tu yaga higo biti' gaca cuía le ribía yaga olivo, ate' tu lubá uva biti' gaca cuía le ribía yaga higo na'. Lësca' caní, nitú ga rilén nisa biti' gaca ila'lén nisa zöna', en nisa siziá'.

Yöl-la' réajni'i le naca idú

¹³ Channö zoè' tu bönni' ládjali' rácadè'è, en réajni'de'enè', lu yöl-la' nōxaj ladxi' queè' ral-la' ulu'è náquiè' caní ni'a que le naca tsahui' runè'. ¹⁴ Na'a, channö ruzxé'eli' luzá'ali', en runli' dxin para ila'gú'u bönachi libí'ili' yöl-la' ba, biti' ral-la' gun ba zxön cuinli' ca naca yöl-la' réajni'i queéli'. Nu run caní rizí' yè', en ridá'baga' le naca idútè li. ¹⁵ Yöl-la' réajni'i caní biti' naca le runödzjè' Dios, pero que yödzölió ni naca, enca' quégaca bönachi yödzölió ni, en que tu' xihui'. ¹⁶ Yugu' bönni' tu'zxé'enè' luzá'agaquiè', en té'ennè' ila'gú'u bönachi légaquiè' yöl-la' ba, lësca' ta'dil-la dídze'è, en tunè' yúgu'tè le ruá' dö'. ¹⁷ Yugu' bönni' nápaquiè' yöl-la' réajni'i na' runödzjè' Dios:

Tunè' le naca idú tsahui', en ta'bözè' dxí'ado'.

Nácagaquiè' zxön ladxi', en nōxaj ladxi'.

Tu'huechi' ládxi'gaquiè' bönachi,
en tunè' le naca dxi'a.

Tuz ca tu'chi'a tu'söröè' luzá'agaquiè',
en biti' ta'béaj bè'è luzá'agaquiè'.

¹⁸ Nupa tuí'i ládxi'gaca ila'bequi dxi le raca, ta'böza dxí'ado', para gaca ca' dxi'a idútè le zeaj naca caz.

Nupa tun zxön le nacuá' yödzölió

4 ¹ ¿Bizx que na' ridíl-lali', en raca didza' bizxaj queéli'? Raca caní queéli' tu' rizé ládxi'li' zían le rizé ládxi'li' tu tuli', en que lè ni na' ridíl-lalenli' luzá'ali'. ² Zían le ruhuídi'li', en tu' cabí rizí'ili' le, que lè ni na' rútili' bönachi. Ruzxé'eli' le dè que luzá'ali', en tu' cabí ridéli'li' le, que lè ni na' rizóa ribó'öli', en ridíl-lali'. Biti' rata' queéli' le ré'enili', tu' cabí rinábali'-nè' Dios lè na'. ³ Sal-la' zoa bi rinábali', biti' bi rizí'ili', tu' cabí naca dxi'a ca rinábali', tu' ré'enili' lè na' rinábali' para ugunli' le dxin ca raza ládxi'sili'. ⁴ Libí'ili', bönachi nusanli'-nè' Dios, çnaru' cabí nózili' channö runli' zxön le nacuá' yödzölió ni, chinuhuöácali' ca nu biti' rilé'e Dios dxi'a? Núti'tès nu ré'eni gun zxön le nacuá' yödzölió ni, nuhuöáca ca nu biti' rilé'e Dios dxi'a. ⁵ Biti' rnnasö ca' le nazúaj lu guichi lá'ayi le rnna: “Dios risól-lè'è Dios Bö' Lá'ayi queéru', Nu zóalen

rë'u, ate' Lë' nadxí'inë' rë'u, en rudúli'në' rë'u channö rusanru'-në'."

⁶ Na'a, zxöntëro le ruzá' ládxë'ë Dios queéru', tu' nazúaj lu guichi lá'ayi le rnna: "Dios ruzáguë'ë xinózzguequi nupa tun ba zxön cuínguequi, pero ruzá' ládxë'ë quégaca nupa nácagaca nöxaj ladxi'." ⁷ Que lë ni na', guli'sóa nöxaj ladxi' lahuë' Dios. Guli'nná be'e tu' xihui', ate' uzxunnaj ga zóali'. ⁸ Guli'güí' ládxí'li' sóalenli'-në' Dios, ate' Lë' idisóalenë' libí'ili'. Libí'ili', bönachi dul-la', guli'gaca tsahui', en bíti'rö gunli' dul-la'. Libí'ili', núlöli' reaj bö' ládxí'do'oli', en chopa le nadxí'ili', guli'gún dxi'a icja ládxí'do'oli'. ⁹ Guli'sëbi ládxí'li', en buli'huí'ini, en guli'cödxí. Na'a ruzxídxili, pero ral-la' códxili'. Rudzėjali', pero ral-la' huí'inili'.

¹⁰ Guli'gaca nöxaj ladxi' lahuë' Xanru', ate' Lë' gunë' ga tsépisëli'.

Biti' ral-la' ichugu bé'ëru' le run luzá'aru'

¹¹ Böchi' luzá'ado', biti' innëli' que luzá'ali' tuli' ia'tuli'. Nu bönni' rinnë' que böchi' luzé'ë, en rilaga yudxë' le runë', bönni' ni rinnë' que xibá queë' Dios, en ruchi'a rusöröë' le rinná bë' xibá na'. Na'a, channö ruchi'a rusöröu' le rinná bë' xibá na', run cuinu' nu ruchi'a rusöröë' le, en biti' runu' ca rinná bë' xibá na'. ¹² Na'a, tuzë' náquië' Dios, Nu ben xibá na', en náquië' ca' Nu ruchi'a rusöröë' le runru'. Lë cazë' gaca usölë' bönachi o usunítië' bönachi na'. Na'a, ñnúxitië run cuinu', rilaga yudxu' luzó'o?

Biti' gaca gunru' löza le gaca cuxó huidzaj

¹³ Na'a, buli'zé nágali', núlöli' rnnali': "Cuxó huidzaj tséajtu' yödzö ni', ate' sóatu' ni' tu iz, en zían le gá'utu', en úti'tu', ate' caní gáta'da' dumí queétu'." ¹⁴ Biti' nózili' bizxi gaca cuxó huidzaj. ¿Nacxi caz naca queéru', tsca zóaru' yödzölió ni? Nácaru' ca bóchila le nalá' tu chí'ido'osö, en la' rinítitë. ¹⁵ Que lë ni na', caní ral-la' innali': "Channö gué'ënnë' Xanru', sóaru' ibanru', en tu ia'tú le gunru'." ¹⁶ Na'a, libí'ili', lu yöl-la' run ba zxön queéli' rigú'uli' yöl-la' ba la' cuínsili'. Yúgu'të le caní le runli' zeaj naca le ruá' dö'. ¹⁷ Channö nóziru' le naca dxi'a le ral-la' gunru', en biti' gunru' lë na', runru' dul-la'.

Santiago rusé'ë ládxí'gaquië' bönni' dë yöl-la' tsahui' quégaquië'

5 ¹ Libí'ili', bönni' rilé'eli' yöl-la' tsahui', guli'cödxí, en guli'cödxí'a, tu' si' za' dza ilé'eli' yöl-la' yechi'. ² Chinaca ditaj yöl-la' tsahui' queéli', ate' chinutógacaba' le ráculi' bóljado' que. ³ Chinaca que dumí oro, en dumí plata queéli' ca naca que guíë nazón yöni que, ate' yöni que na' naca ca tu le ruzegui libí'ili' didza', ate' gaca queéli' ca tu guí' le usuniti libí'ili'. Caní gaca queéli', tu' busó' butúbili' queézili' yöl-la' tsahui' dza ni zóaru' chiröjsétëgaca. ⁴ ¡Buli'yútsöca! Yugu' bönni' huen dxin gula'lapë' yöla queéli' chita'naba yúdxinë' lázxjagaquië', tu' cabí riguízxjanili' légaquië', ate' lë na' ta'nabë' bönni' huen dxin na'

chibidxín didza' na' lahuë' Xanru', ate' Lë' rinná bé'enë' ni'a në'ë guizxi yu. ⁵ Benli' ga buné'eli', en güí'i gudágutica'sili' le rnnsö queé'li' lu yödzölió ni. Buxón cuinli', pero chizóa idxín dza údxi queé'li'. Gaca queé'li' ca raca queé'ba' bédxi renni', chibú'u dza gútiru'-ba'. ⁶ Richúguli' quégaquië' bönni' tsahui', en rútili' légaquië', ate' légaquië' biti' ta'dá'baguë'ë libí'ili' cate' rútili' légaquië'.

Cózaru' zxön ladxi', en ulídzaru'-në' Dios

⁷ Na'a, böchi' luzá'ado', guli'cöza zxön ladxi' ga idxinrö dza huödë' Xanru'. Buli'yú ca runë' tu bönni' guz gú'una. Lu yöl-la' riböza zxön ladxi' ribözë' guiójsiu', en guiój cusu lin, ate' tödi ni' ulapë', en utubë' yöz zían. ⁸ Lësca' caní, libí'ili' na' réajlë'ëli' Cristo, guli'cöza zxön ladxi', en buli'tipa ládxi'li', tu' chizá' gala' dza huödë' Xanru'. ⁹ Böchi' luzá'ado', biti' innëli' que luzá'ali' tuli' ia'tuli', para cabí ibága'li' xíguia'. ¡Buli'yútsöca'! ¡Chirudzaga lo udxinë' Xanru', ate' uchi'a usöröë' le runli'! ¹⁰ Böchi' luzá'ado', buli'yú ca guca quégaquië' bönni' gulu'e didza' uláz queë' Xanru'. Nácagaquië' ca tu le ruluí'i rë'u ca ral-la' quí'i sáca'ru', en cózaru' zxön ladxi'. ¹¹ Na'a, nucuá'aru' légaquië' ca yugu' bönni' guláquië' bica' ba, nupa ni' gula'guí'i gula'zaca'. Chibiyónili' ca benë' Job. Gulözë' zxön ladxi' sal-la' gudí'i guzxáca'dë'ë, ate' nózili' ca' ca benë' Xanru' queë' ga búdxitë. Ruhuéchi'da' ládxë'ë Xanru' rë'u, en ruí'i ládxë'ë rë'u.

¹² Böchi' luzá'ado', le nácatërö lo naca lë ni rea' libí'ili': ¡Biti' uzótjali' Nu zoa yehua' yubá, en biti' uzótjali' le nacué' luyú ni, en biti' uzótjali' bítitës bi run tsutsu xtídza'li'! Cate' innali' "Ön" ral-la' innásili' "Ön." Cate' innali' "Biti'" ral-la' innásili' "Biti'." Caní ral-la' gunli', para cabí ibága'li' xíguia' lahuë' Dios.

¹³ Channö riguí'i rizáca' nu dzaga libí'ili', ral-la' ulidza Dios nu na'. Channö zoa nu rudzeja, ral-la' gul-la' yöl-la' ba nu na'. ¹⁴ Channö re'e nu dzaga libí'ili', ral-la' ulidza bönni' gula tapa chi'ë bönachi queë' Cristo, para ulu'lidzë' Dios, en ila'nábinë' Lë' únë' bönni' huë' na'. Ral-la' ila'gu'ë lë' le za, en ulu'gunë' dxin Lë' Xanru'. ¹⁵ Cate' ulu'lidzë' Dios, en ta'yéajlë'ë gunë' Cristo ga huóáquië' bönni' huë' na', ní'irö gunë' Xanru' ga huóása uzóë', en channö benë' dul-la' bönni' huë' na', Xanru' uniti lahuë' lë'. ¹⁶ Que lë ni na', guli'xóalëpi dul-la' nabága'li' tuli' ia'tuli', en guli'naba que luzá'ali' tuli' ia'tuli' lahuë' Dios para únë' libí'ili', para urúaj yödzöhuë' na' ré'eli'. Le rulidzë' tu bönni' tsahui' Dios, le runë' idú ládxë'ë, nácada' lesaca'. ¹⁷ Elías, bönni' ni' bë'ë didza' uláz queë' Dios, gúquië' tu bönni' yödzölió ca nácaru' rë'u, pero cate' bulidzë' Dios, en gunábinë' Lë' para cabí galaj guiój, idú tsonna iz yu' xopa beo' biti' gulaj guiój luyú ni. ¹⁸ Gudödi ni' bulidzë' Dios leyúbölö, ate' böálaj guiój, ate' bunödzej le gulazë' yugu' bönni' dza ni'.

¹⁹ Böchi' luzá'ado', læ ni ral-la' inó'zili'. Channö nunbë' nu bönni' dzáguië' libí'ili' le naca idútë li, en richixi riníguinë', ate' zoa nu gun ga ubí'i ládxë'ë bönni' na' richixi riníguinë', ²⁰ nu na' gun ga ubí'i ládxë'ë bönni' dul-la' na' gudé' ga yúbölö, usölé' bönni' dul-la' na' lu yöl-la' guti, en gunë' ga uniti lahuë' Dios dul-la' zián nabáguë'ë bönni' na'. ¡Ca' gaca!